

Ultimatum di minister Oduber ta musta 'done deal'

ORANJESTAD - Minister Oduber a duna gabinete Mike Eman II su ultimatum ayera por medio di un carta na gobernador. E ta spera cierto cambio grandi den e maneho prome cu 1 di maart sino e lo tuma su retiro. Pero analisando su post riba Facebook, e ta musta un 'done deal'.

Mayan prome minister Mike Eman ta sinti cu sr. Oduber riba e situacion. Por lesa loke Minister Eman a reacciona den e articulo cu sigui aki bou. Aki bou por lesa e post di minister Oduber despues cu el a papia cu prensa:

"Cu conviccion grandi y cu interes general na pecho awe tardi ma entrega na nos Gobernador mi decision final pa loke ta trata mi futuro como Minister. E situacion ta uno den cual mi no ta identifica mi mes mas cu cierto puntunan clave di e maneho actual di Gabinete Mike Eman II. Tin diferente puntunan di atencion riba bienestar nacional cu mi no ta

comparti y ta sinti cu no ta hayando e atencion necesario. Porta no a wordo cera, semper tin espacio pa haci e cambionan na bienestar nacional, mientras tanto e decision ta cu entrante 1 di maart lo mi entrega e posicion di minister pa asina por finaliza diferente proyecto di gran importancia y haci e transicion pa e siguiente minister uno mas facil posibel."

Preocupacionnan grandi

Despues su reunion cu gobernador el a bisa prensa wardando pafo cu el a comparti su preocupacionnan 'hopi grandi' cu gobernador riba e maneho. "Tin un crisis den e sentido di un diferencia di opinion hopi grandi entre mi persona



y gabinete. Pa loke ta e situacion di carnaval y permisonan esakinan ta solamente tip riba e ijsberg cu ya tabatin", Sr.

Oduber a enfatisa.

Siguridad y financia publico

"Tin diferencianan di opinion cu ta wordo bringa y discuti paden y respet semper mi tabatin pa mi gabinete. Pero cierto momento ora cu no ta haya oido mas paden y ora ta papia di bienestar general pa loke ta trata maneho di husticia y siguridad den comunidad. Ora ta traha cu alma y cuerpo 14 of 16 ora pa tin un turismo na e nivel cu e ta actualmente.

Ora cu den 6 aña den tur rapport ta indica cu e economia a bira fuerte a base di e maneho aki di henter ekipo di e mesun decisionnan cu e gobierno aki a tuma cu a logra e bienestar aki den e pilar economico aki. Y cu no momento cu no ta haya oido

riba e menasanan mas grandi cu tin, e ora mester comunica esaki na un nivel mas halto pa e atencion wordo brinda mescos cu ta e caso cu financia publico."

Segun Sr. Oduber esakinan ta algun di e puntunan unda cu e ta sinti cu e no ta haya atencion debido den e team cu e ta forma parti di dje. Cual ta haci cu e mester recurri na un otro decision.

Contenido ultimatum

"Mi a entrega un carta cu ta indica cu pa prome di maart si mi no ta mira un diferencia of cambio pa loke ta bienestar general di Aruba. Un cambio especificamente riba e dos terenonan aki y hopi mas preocupacion manera e sosten cu mester tin di coleccionan di husticia, enseñansa of financia por ehempel, e ta dificil pa un persona continua su labornan si bo no ta acorda mas cu e pensamiento di e reto di gabinete." Finalmente e minister ta bisa cu te cu awor no tin e plan pa lanta un partido politico nobo y sigui su futuro den politico. □

Prome Minister Eman: 'lo tin combersacion cu minister Oduber proximamente'

ORANJESTAD - Prome minister Eman lo reuni cu minister Oduber mañan riba su ultimatum prome cu e ta bay duna un comentario mas profundo.

Aki bou por lesa e relato oficial: Den un declaracion duna na prensa prome minister Eman a enfatisa cu e ta haya importante pa papia personalmente cu su amigo y colega minister Oduber prome cu duna un reaccion. Prome minister Eman, kende tabata den un retreat cu demas ministernan, a sali pa duna un declaracion cortico na prensa y a bisa nan cu prome cu minister Oduber a bay Gobernador Refunhol, el a papia cu ne.



"Den e combersacion cu minister Oduber mi a sinti cu tabatin hopi emocion. Mi a palabra cu ne cu mi lo tin un otro combersacion cu ne

prome cu mi por duna mas comentario riba contenido di loke el a expresa. Aki nos ta papia di un periodo di añanan di amistad, di colegialidad, di luchanan hunto pa duna

awor comentarionan cu por wordo interpreta di diferente forma." Prome minister Eman a reitera cu nan ta hunto den un organisacion politico pa añanan largo y trahando den gobierno hunto cu resultadonan hopi grandi y positivo pa pais Aruba.

"Mi ta sinti awor cu ta mas na su lugar pa tin un bon combersacion entre mi persona cu minister Oduber prome cu mi duna cualkier comentario riba comentario." Eman na mas di un ocasion a stress cu e combersacion cu e ta bay tene cu Minister Oduber ta

importante prome cualkier otro declaracion wordo haci. "Minister Oduber merece esey. E trabounan cu nos ta haciendo pa nos pais y nan importancia merece un proceso serio." Na final Eman a bisa cu su gobierno ta un ekipo. Mester ta asina tambe pa por logra e resultadonan cu un pais manera Aruba mester. Riba varios pregunta di prensa pa duna un declaracion riba loke minister Oduber a bisa Eman a keda para'riba cu sin e combersacion cu e ta bay tene cu minister Oduber no ta corecto pa haci cierto expresionnan. "E no ta cuadra tampoco cu e amistad y colegialidad cu nos tin di hopi aña." □